

فريق التفريغ بموقع الطريق إلى الله

يقدم

من سلسلة "بصائر قرآنية"

تفسير سورة النازعات (2)

"باللهجة المصرية"

لفضيلة الشيخ: أحمد عبد المنعم

رابط المادة: <http://way2allah.com/khotab-item-101358.htm>



السلام عليكم ورحمة الله وبركاته

بسم الله والصلاة والسلام على رسول الله، صلى الله عليه وسلم، نكمل بإذن الله عز وجل تفسير سورة النازعات..

**طغيان النفس.. مرض خطير يمنع خشية الله**

كنا توقفنا في المرة السابقة عند نهاية قصة فرعون، هذا الطاغية اللي كان فيه مرض من أصعب الأمراض، وهو مرض **طغيان النفس**، والنفس التي لا تروّض، كده كده النفس لازم تكبر، إمّا تكبر تتزكى، تكبر نمو مهذب، أو تكبر تطغى، يعني كده كده الكون كله بيتسع، الكون كله بينمو، الكون كله بيربو فيحتاج إلى رب..

فالكون كله بيتسع، يعني **"وَالسَّمَاءَ بَنَيْنَاهَا بِأَيْدٍ وَإِنَّا لَمُوسِعُونَ"** الذاريات:47 النفس كذلك بذرة النفس تبدأ تكبر **"فَأَلْهَمَهَا فُجُورَهَا وَتَقْوَاهَا"** الشمس:8 **"فإما أن تطغى، وإما أن تتزكى، وإحنا قلنا المرة اللي فاتت التزكى: إن النفس تنمو ولكن مع طهارة، قالوا حتى الزكاة دي زيادة في الشيء لكن مع جودة في النوع، إنك إنت بتتخلص من الآفات.**

**عقاب الدنيا والآخرة ناله فرعون بسبب طغيانه**

هذا المرض المستعصي مرض طغيان النفس اللي بيمنع من الخشوع، ويمنع من الخشية، كان عند فرعون وكانت هذه النهاية التي والعباد بالله ازداد فيها الطغيان إلى أعلى حد، فرينا جابلهم نموذج لأعلى طغيان، إنه وصل لمرحلة والعباد بالله **"فَقَالَ أَنَا رَبُّكُمُ الْأَعْلَى \* فَأَخَذَهُ اللَّهُ..."** على طول فاء التعقيب **"فَأَخَذَهُ اللَّهُ نَكَالَ الْآخِرَةِ وَالْأُولَى"** النازعات:24،25 **"نَكَالَ الْآخِرَةِ وَالْأُولَى"** أي عقاب في الآخرة وفي الدنيا..

وبدأ بعقاب الآخرة لأنه أشد، ده كان اختيار الإمام ابن كثير، والإمام الطبري اختار **"نَكَالَ الْآخِرَةِ وَالْأُولَى"** إن فرعون لما قال: **"مَا عَلِمْتُ لَكُمْ مِنْ إِلَهٍ غَيْرِي"** القصص:38 دي كانت الكلمة الأولى، والكلمة الثانية اللي هي الآخرة **"أَنَا رَبُّكُمُ الْأَعْلَى"** فرينا عاقبه على الكلمة دي والكلمة اللي فاتت.

**احذر من التهاون بالصغائر.. خذ العبرة من فرعون**

كأن أحياناً الإنسان يعمل مصيبة ضخمة فرينا مايعاقبوش، فيثني على هذه المعصية الضخمة بمعصية أكبر؛ فيعاقبه الله

بالمعاصي جميعاً، لما يتأخذ ده يتأخذ على كله، بيحاسب على النقيير و القطمير، ولذلك قالوا "مَالِ هَذَا الْكِتَابِ لَا يُغَادِرُ صَغِيرَةً وَلَا كَبِيرَةً" الكهف: 49 بدؤوا بالصغيرة "صَغِيرَةً وَلَا كَبِيرَةً"؛ لأنه لما قعد يزود الصغيرة وصل للكبيرة، فرينا عاقبه على الصغيرة وعلى الكبيرة.

"فَأَخَذَهُ اللَّهُ نَكَالَ الْأَخْرَةِ وَالْأُولَى" نكال: لما تُنكَل بواحد، النكَل ده أصلاً الحاجة اللي زي الكلبشات بس بدل ما في الإيد.. في الرجل، بتتربط بحيث إن هي تمتع الإنسان من الحركة، فقالوا إن تنكل لواحد، أو العقوبة تبقى نكال يعني إيه؟ يعني اللي يشوفه مايقربش، اللي يشوف المربوط ده يقولك هو ده عمل إيه عشان ما أعملش زيه، فلما تنكل بجد يعني إيه؟ يعني تمتع غيره من أن يفعل فعلته.. فعقاب فرعون، لذلك الله عز وجل أبقي جثته وجعله آية للعالمين؛ عشان محدش يعمل اللي هو عمله "فَأَخَذَهُ اللَّهُ نَكَالَ الْأَخْرَةِ وَالْأُولَى \* إِنَّ فِي ذَلِكَ.. " أي في هذه القصة ". لَعِبْرَةً لِّمَن يَخْشَى" تاني الكلام عن الخشية "وَأَهْدِيكَ إِلَى رَبِّكَ فَتَخْشَى" النازعات: 19 "إِنَّ فِي ذَلِكَ لَعِبْرَةً لِّمَن يَخْشَى" النازعات: 26 وهيحي آية "إِنَّمَا أَنْتَ مُنذِرٌ مِّنْ يَخْشَاهَا" النازعات: 45.

### ما معنى العبرة وكيف نتعظ بها؟

طيب عبرة يعني إيه في اللغة؟ العبرة: الاعتبار والانعاط، أصل الكلمة "عبر" يعني انتقل من مكان لمكان، العبور هو انتقال مثلاً من الشاطئ ده للمكان ده، ده العبور، لذلك يقولك تعبير الرؤية.. يعني إيه تعبير الرؤية؟ إن الرؤية كانت خيال لما واحد يعرف أولها، يفسرها يعني نقلها، عَبَّرَ بها من الخيال إلى الحقيقة، وَعَبَّرَ العين سميت لأن الدموع انتقلت..

"إِنَّ فِي ذَلِكَ لَعِبْرَةً" يعني إيه الاعتبار بقى والانعاط؟ إنك تنتقل من مرحلة كنت فيها لمرحلة تانية، يبقى إنت كده اعتبرت، يبقى إنت كده عبرت.

يعني قريش لو سابوا الطغيان وعبروا إلى الخشوع يبقى كده أنقذوا أنفسهم، فرينا بيقوله: "إِنَّ فِي ذَلِكَ لَعِبْرَةً" هذه القصة كفيفة وكافية أن تنتقل بكم من مكان نزول العذاب، وإن إنتوا تُعاقبوا زي ما فرعون عاقب، إنها تعبر بيكوا إلى بر الأمان، إلى شاطئ الأمان، وده الاعتبار، بنقول واحد كان جاله عبرة في واحد يعني إيه اعتبر بيه؟ يعني انتقل من مكان المعصية إلى مكان الطاعة، ساب إنه بعد ما كان عاصي أصبح بقى ملتزم بطاعة الله عز وجل، ده نقول عليه اعتبر؛ لأنه عبر من حاجة لحاجة.

"إِنَّ فِي ذَلِكَ لَعِبْرَةً" لكن مش لأي حد، للي خايف من ربنا "لِّمَن يَخْشَى" وزى ما قلنا هيحي في الآخر "إِنَّمَا أَنْتَ مُنذِرٌ" مش أي حد هيستفيد "مَن يَخْشَاهَا" هو بس اللي هيستفيد.

يا من تتجرأ على الله.. ألم تتفكر في مخلوقات الله وترى قدرته؟

بعد كده ربنا بيقول "أَنْتُمْ" شوف صيغة "أَنْتُمْ" استفهام "أَنْتُمْ" دي زي لما قال: "أَنَا رَبُّكُمْ الْأَعْلَى" لما قال: "أنا" فرنا بيقوله أنت؟! لما قال "أَنَا رَبُّكُمْ" ربنا بيقولهم "أَنْتُمْ أَشَدُّ خَلْقًا أَمْ السَّمَاءُ ۖ بَنَاهَا" يعني يا قريش لو ما كنتوش شفتوا فرعون وهو بيغرق، طاب ماشفتوش السماء مبنية؟! يا قريش طاب إنتو ماشفتوش فرعون وهو بيغرق وبيتأخذ في العذاب، ماشفتوش الأرض إزاي مبسوطة؟! ماشفتوش الليل؟! ماشفتوش النهار وهو بيطلع؟ ماشفتوش الليل "وَأَغْطَشَ لَيْلَهَا وَأَخْرَجَ ضُحَاهَا" ماشفتوش "وَالْجِبَالَ أَرْسَاهَا"؟! ماشفتوش قدرة ربنا؟! ..

إنت اللي بتقول "أَنَا رَبُّكُمْ" أنت أشد أم الجبال؟ يبقى الجبال تدّعي الربوبية؟ أنت أشد أم السماء؟ يبقى السماء تدّعي الربوبية؟ أنت أشد أم الأرض؟ يبقى الأرض تدّعي الربوبية؟! "قَالَتَا أَتَيْنَا طَائِعِينَ" فصلت: 11 إذا كانت السماء والأرض قالتا: "أَتَيْنَا طَائِعِينَ" أنت تقول أنا ربكم؟! أنت؟! يا اللي بتقول أنا "أَنْتُمْ أَشَدُّ خَلْقًا أَمْ السَّمَاءُ ۖ بَنَاهَا"؟  
النازعات: 27.

### الفرق بين آيات القدرة في سورة النبا وسورة النازعات

هنجد الآيات هنا دائما كل سياق آيات حتى لو في نوع تشابه، مثلا سياق آيات الجنة في القرآن، سياق آيات النار، سياق آيات قدرة ربنا وخلق ربنا، بالرغم إنّ ممكن تحس إن آيات الجنة فيها شبه من بعض، لكن كل سياق يركز على معنى مُعيّن في الجنة، كذلك في العذاب كل سياق في العذاب يركز على معنى، كذلك في قدرة الله، هنا الكلام عن خلق الله غير السياق بتاع سورة النبا..

### سياق سورة النبا:

سياق سورة النبا كان فيه بيان النعمة "أَلَمْ نَجْعَلِ الْأَرْضَ مِهَادًا" أنا عملت لكم الأرض مهدتها لكوا، وخليتلكوا الجبال زي الوتد بتاع الخيمة "وَالْجِبَالَ أَوْتَادًا" وكان فيه أيضا مشهد القدرة، وبعدين مشهد التفضّل والمنّ "وَخَلَقْنَاكُمْ أَزْوَاجًا \* وَجَعَلْنَا نَوْمَكُمْ سُبَاتًا" خليتك تنام تستريح وطفيتلك النور بالليل عشان تعرف تنام "وَجَعَلْنَا اللَّيْلَ لِبَاسًا" ونورتلك الدنيا بالنهار عشان تعرف تشتغل "وَجَعَلْنَا النَّهَارَ مَعَاشًا \* وَبَنَيْنَا فَوْقَكُمْ سَبْعًا شِدَادًا \* وَجَعَلْنَا سِرَاجًا وَهَاجًا \* وَأَنْزَلْنَا مِنَ الْمُعْصِرَاتِ مَاءً ثَجَاجًا \* لِنُخْرِجَ بِهِ حَبًّا وَنَبَاتًا \* وَجَنَّاتٍ أَلْفَافًا" النبا: 6:16.

### سياق سورة النازعات.. هيمنة الله على كل شيء في الحياة:

لكن هنا المشهد مشهد الهيمنة، زي مشهد نزع الروح كده، مشهد الهيمنة، ربنا بيقول: "السَّمَاءُ ۖ بَنَاهَا" لما ربنا يقوها تتبني تتبني، ويرفعها ماتقعش "رَفَعَ سَمَكَهَا فَسَوَّاهَا \* وَأَغْطَشَ لَيْلَهَا..." يحلّي الليل يطلع.

كلمة أغطش.. "أَغْطَشَ لَيْلَهَا" يعني الليل الذي لا رؤية فيه "وَأَخْرَجَ ضُحَاهَا" الضحى الحاجة اللي تنور كل حاجة، خلى في السماء هذه المتضادات، الله.. وكلمة أغطش وأخرج، "أَغْطَشَ لَيْلَهَا وَأَخْرَجَ ضُحَاهَا \* وَالْأَرْضَ بَعْدَ ذَلِكَ دَحَاهَا \* أَخْرَجَ مِنْهَا مَاءَهَا وَمَرْعَاهَا" النازعات: 26:27 الأرض دي التراب والطين، إزاي ربنا طلع منها مية ومرعى؟

إزاي؟ إزاي جعل فيها.. لو قلنا مرعاها اسم مكان، إزاي جعل فيها أماكن للناس ترعى بالرغم من إنها صخور وتراب؟ هيمنة الله عز وجل، قال للسماء ترتفع.. ترتفع، قالها تستوي.. تستوي، قالها ماتقعش.. ماتقعش، قال الأرض تمتد.. تمتد، قال الجبال تقف.. تقف أوتاد، قال للليل يطلع.. يطلع، قاله ينزل.. ينزل، قال للنهار يخرج.. يخرج، قدرة الله وهيمنة المطلقة، زي ما ربنا يقول للروح تخرج.. فتخرج، فمش بس الهيمنة والقدرة المطلقة على نفوس البشر.. لأ.. ده على كل شيء في الحياة.

اختلاف المفسرون في المقصود بـ "دحاها" .. واتفاقهم على قدرة وهيمنة الله

"أَأَنْتُمْ أَشَدُّ خَلْقًا" فتجد حتى إن ألفاظ الآيات فيها قوة "أم السماء ٦ بناها \* رَفَعَ سَمَكَهَا فَسَوَّاهَا \* وَأَغْطَشَ لَيْلَهَا وَأَخْرَجَ ضُحَاهَا \* وَالْأَرْضَ بَعْدَ ذَلِكَ دَحَاهَا" النازعات 27:29 الأرض العجيبة الصخرية دي "دَحَاهَا" وطبعًا الكلام في "دَحَاهَا" بعض اللي اتكلموا في الإعجاز العلمي قال إن "دَحَاهَا" هنا بمعنى جعلها كروية، واختلفوا هل الأودية هل دي بيضة النعامة؟ ولا الحفرة اللي بتعملها؟ أيًا كان..

وقالوا إن الحسن والحسين كانوا بيلعبوا لعبة كده بيجيبوا صخرة، ويحفروا حفرة، ويرموا الصخرة، فالصخرة تلف لغاية.. واللي يوقعها في الحفرة يكسب، فقالوا هو ده مشهد زي ما الشيخ حب النبك المدينة ماقال في تفسيره، قال: هو ده مشهد الأرض، مرمية في الهواء، بتلف في شكل كروي؛ لأن الحجارة اللي كانوا بيستعملوها حجارة كروية، أيًا كان..

وبعضهم لأ، المتقدمين قالوا لأ، دحاها مش معناها كده، وإن كروية الأرض مستفادة من آيات أُخْرَ، وذكر شيخ الإسلام ابن تيمية في أكثر من موضع الكلام ده، ونقل الشيخ عطية سالم في تفسير "تتمة أضواء البيان" اللي عايز يرجع يعني للموضوع ده، نقل كتير من كلام العلماء، بعضهم قال لأ.. دحاها معناها ما بعدها يفسره "أَخْرَجَ مِنْهَا مَاءَهَا وَمَرْعَاهَا".

الشاهد هيمنة الله عز وجل على الأرض سواء كانت بقى جبال صخرية، سواء كانت سماء هوائية، سواء كانت جبال.. أيًا كان، الله قادر على كل شيء، قادر إنه يسوي كل شيء. "رَفَعَ سَمَكَهَا فَسَوَّاهَا" النازعات: 28 لا شيء يستعصي على الله عز وجل، لا شيء يمتنع من الله عز وجل، الله عز وجل عزيز لا يُعَالَبُ سبحانه وتعالى.

"وَالْأَرْضَ بَعْدَ ذَلِكَ دَحَاهَا" أَخْرَجَ مِنْهَا مَاءَهَا وَمَرْعَاهَا" النازعات 30:31 قالها تطلّع اللي فيها فأخرجت "وَأَذْنَتْ لِرَبِّهَا وَخَفَّتْ" الانشقاق: 2 "أَخْرَجَ مِنْهَا مَاءَهَا وَمَرْعَاهَا \* وَالْجِبَالَ أَرْسَاهَا" النازعات 31:32.

سخر الله الأرض لساكنيها

الله عز وجل أرسى الجبال، وأرسى بها سبحانه وتعالى، أرسى الجبال: خلى الجبال ثابتة وخلها ماثبة **"وَالْجِبَالَ أَرْسَاهَا"** ربنا عمل كل ده ليه؟ **"مَتَاعًا لَكُمْ وَلِأَنْعَامِكُمْ"** النازعات:33 عجيب أوي كلمة **"وَلِأَنْعَامِكُمْ"** دي كأن المعنى.. هذه الآيات الكونية وهذه النعم الدنيوية، أنتم تستفيدون منها، أنتم والأنعام.

### الفارق بينكم وبين الأنعام:

والفارق بينكم وبين الأنعام هو تحويل هذه الآيات أنها تذكركم بالله، الفارق بينكم وبين الأنعام أنكم تشكرون الله وتذكرون الله عند رؤية هذه الآيات، الفارق بينكم وبين الأنعام أن الأنعام تفعل ما تشتهي وما تريد **"يَتَمَتَّعُونَ وَيَأْكُلُونَ كَمَا تَأْكُلُ الْأَنْعَامُ"** محمد:12.

الأنعام بتأكل إزاياي؟ الأنعام ما بتفكرش قبل ما بتأكل، لكن ربنا قال: **"فَلْيَنْظُرِ الْإِنْسَانُ إِلَى طَعَامِهِ"** عبس:24، يفكر، غير الأنعام بياكل وخلص، الأنعام آخر مستوى تفكيرها إن يتحطها الأكل، زي ما هنقول في سورة عبس، هي لا تُبْصِرُ إلا هذه اليد اللي وضعت لها الأكل، إنت متعرفش الأكل ده جه إزاي، ودورة حياة المطر، وإزاي نزل، والبذرة طلعت، متفكرش، المفروض الإنسان ميقاش كده، ففي فارق لازم يفرقكوا عن الأنعام، وإلا هتبقوا متساويين، **"مَتَاعًا لَكُمْ"** وهنتكلم في الكلام ده في سورة عبس إن شاء الله.

### ما هي الطامة وما معناها؟

**"مَتَاعًا لَكُمْ وَلِأَنْعَامِكُمْ"** فجأة المشهد توقف بتاع النعم، ورجعنا تاني للدار الآخرة **"فَإِذَا جَاءَتِ الطَّامَةُ"** النازعات:34، شوف حتى المد، يعني ده بيسموه حتى في الإعجاز الصوتي إن اللفظة ليها معنى **"فَإِذَا"** هنا دي فجائية، فجأة وهما قاعدين بيتمتعوا في الدنيا وناسيين إن الآيات دي تدل علي قدرة الله المطلقة سبحانه وتعالى، جات نسبة الطامة إن هي جات **"جَاءَتِ الطَّامَةُ الْكُبْرَى"** يعني إيه الطامة؟

الطامة قالوا اللي بتطم وتغطي كل شيء، طم الماء يعني غطي كل شيء، قريب من كلمة طغى الماء كده، فالطامة يعني هيبجي مصيبة تغطي على كل شيء في الدنيا، يعني أحياناً والعياذ بالله مثلاً واحد ربنا يعافينا مثلاً عربيته تتخبط، وابنه يتعب، ومش عارف إيه، خمس ست مصايب يحصلوا، وفجأة يجيلوا خبر وفاة مثلاً حد عزيز جداً، أوخبر فيقولك بس.. دي مصيبة نستني كل حاجة، دي الطامة أي التي غطت على كل شيء، **"الْكُبْرَى"** كمان زيادة أي لا شيء بعدها.

### أسماء يوم القيامة لها معانٍ خاصة

خدوا بالكوا يا جماعة من أسماء القيامة مهمة جداً، يعني اسم التغابن له حكمة إنه يبجي في سورة التغابن، ودراسة سورة التغابن يوضح ليه الاسم ده جه هنا، الصاخة زي ما هتيجي في سورة عبس بتتهم بالأذن، تصخ الأذان تمنع،

جات مع واحد في أول السورة مش عايز يسمع، الغاشية جات مع قول الله عز وجل في سورة الغاشية جات على البصر، فالغاشية ربنا يقولهم طالما جات على البصر يقولهم إيه؟ **"أَفَلَا يَنْظُرُونَ إِلَى الْإِبْلِ كَيْفَ خُلِقَتْ \* وَإِلَى السَّمَاءِ كَيْفَ رُفِعَتْ"** الغاشية: 17، 18 طالما في حاجة بتغشى عينيك طاب ما تفتحها وبص..

هنا الطامة جات على العقل، يبقى إذا كانت الصاخة خاصة بالأذان، والغاشية خاصة بالأبصار، وبعضهم قال القارعة خاصة بالقلوب، فممكن تبقى الطامة خاصة بالعقول، حاجة هتخليه يذهل عن كل شيء، لا يفكر في شيء.

قلنا المرة اللي فاتت **"الآيَةَ الْكُبْرَى"** النازعات: 20 الآية التي لا يستطيع أن يتماسك أمامها فإما أن يؤمن، وإما أن يجحد، وبما إن هو مُحَيَّر هو حر، الطامة الكبرى أيضاً التي لا يتماسك أمامها، لكن هينهار خلاص، لأنه هنا معدش مخير، الكافر هنا هينهار والعياذ بالله، فالطامة أي المصيبة الكبرى التي تغطي على العقول، ولا يفكر في شيء، ينسى كل حاجة، يبقى الطامة خاصة بالعقول، والصاخة بالأذان، والغاشية بالأبصار، والقارعة بالقلوب.

### من هؤل المصيبة سينسى الإنسان كل شيء عدا عمله

طب الطامة بالعقول، تخليه مصيبة ينسى كل حاجة، لكن العجيب إن اسمها **"الطَّامَةُ الْكُبْرَى"**، الآية اللي بعدها على طول **"يَتَذَكَّرُ"** هو هيفتكر؟ ولا هينسى كل حاجة؟ هو هينسى كل حاجة إلا حاجة واحدة بس، معدش هيفكر غير في حاجة واحدة في حياته، لا عاد هيفكر في عيال، ولا في أبوه، ولا في أمه بل لو شافهم يجري منهم، ولا في فلوسه، ولا في عربياته، ولا في اللي تعب عشانه، ولا في حاجة.. قعد، ولا في وظيفة قعد عشانها 20 سنة هيسيبها، وشهادة قعد عشانها 30 سنة هيقطعها، وهيجري **"يَوْمَ يَفِرُّ الْمَرْءُ مِنْ أَخِيهِ \* وَأُمِّهِ وَأَبِيهِ \* وَصَاحِبَتِهِ وَبَنِيهِ"** عبس 34:36 طامة عظيمة هتخليه يفتكر حاجة واحدة **"يَوْمَ يَتَذَكَّرُ الْإِنْسَانُ مَا سَعَى"** النازعات: 35.

كإن الطامة دي هتخليه ينسى كل حاجة إلا حاجة واحدة "الذنوب، الطاعات" **"مَا سَعَى"** اللي عمله زي ما النبي صلى الله عليه وسلم يقول: **"كل الناس يغدو.."** صحيح مسلم كل الناس لازم هتتحرك كل الناس لازم هتعمل حاجة، زي ما بيروى عن النبي صلى الله عليه وسلم **"أصدق الأسماء حارث وهمام"** حسنه ابن تيمية أصدق الأسماء، يعني ممكن واحد يبقى اسمه كريم بس هو حقيقي ميقاش كريم، فالاسم هنا مش منطبق عليه، لكن لو واحد اسمه حارث أو همَّام ده منطبق؛ لأن كده الناس بتتحرك أي بتفعل، وهمام يعني عندها هم، كده كده الناس هتبدل، كده كده الناس هتسعى، إما أن تسعى في الخير، وإما أن تسعى في الشر.

ومن اللطائف كلمة **"يَوْمَ يَتَذَكَّرُ الْإِنْسَانُ مَا سَعَى"** مع كلمة **"ثُمَّ أَدْبَرَ يَسْعَى"** النازعات: 22 هيجي اليوم اللي الفراعنة هيتذكروا فيه سعيهم لهدم الدين، هيجي اليوم اللي المتكبرين هيتذكروا فيه سعيهم لهدم دين الله عز وجل، هيجي فيه

اللي كل السَّحْرَةَ على مدار الزمان اللي حاولوا يسحروا أعين الناس ويصرفوهم عن الدين هيتذكروا هذا السعي، يعني أهل الباطل بيتبعوا هيفتكروا التعب ده اللي هُما تعبوه في الباطل والعياذ بالله، وأهل الإيمان تبعوا هيفتكروا السعي ده **"يَوْمَ يَتَذَكَّرُ الْإِنْسَانُ مَا سَعَى"**.

يبقى إذن **"يَوْمَ يَتَذَكَّرُ"** ده اللي هو إيه؟ اللي هو يوم الطامة، اللي الطبيعي ميفتكش حاجة، اللي ربنا قال: **"يَوْمَ تَرَوْنها تَذَهَلُ كُلُّ مُرْضِعَةٍ عَمَّا أَرْضَعَتْ"** الحج:2، وكلمة مرضعة غير مرضع، مرضع يعني في فترة الرضاعة، يعني السنتين بتوع الرضاعة دي مرضع، مرضعة يعني لحظة الرضاعة، وضيفت تاء التأنيث دي لأن الاسم المؤنث لو هو لا يصلح إلا للإناث مايبحتجش تاء تأنيث، يبقى اسمها مرضع؛ لأن مفيش راجل بيرضع، فاسمها مرضع، فمرضع يعني فترة الرضاعة..

مرضعة يعني لحظة الرضاعة، يعني تبقى بترضعه وبتحط عينيه في عينيه ودي من أجمل اللحظات عند الأم، وبترضع الطفل مش ترميه **"تَذَهَلُ"** هي دي الطامة، **"تَذَهَلُ"** يعني ولا كانه كان موجود، ولا كانه كانت بترضع، مش بس تنسى **"تَذَهَلُ"** هي دي الطامة، في اللحظة دي اللي **"وَتَرَى النَّاسَ سُكَارَى"** الحج:2.

هيفضل فاكر حاجة واحدة بس قاعدة شغلاه هي إيه؟ الذنوب، الذنوب اللي كان ناسيها، الحاجات اللي مكنتش عايز يفتكرها، اللي لما كان حد يبجي يكلمه عنها مش عايز يسمعها **"يَوْمَ يَتَذَكَّرُ الْإِنْسَانُ مَا سَعَى"**.

**ما الفرق بين يذكر و يتذكر؟ ولماذا قال سبحانه "يتذكر"؟**

حتى بعضهم قال من اللطائف إن الإنسان أصلاً جاية من كلمة "نسي" على أحد الأقوال، أو من الأُنس إن الإنسان يستأنس بيه سواء الألف زائدة أو أصلية، أيًا كان.. فقالوا **"يَتَذَكَّرُ الْإِنْسَانُ مَا سَعَى"** يعني من طبيعته إنه بينسى لكن هنا هيفتكرك بقى **"يَوْمَ يَتَذَكَّرُ الْإِنْسَانُ مَا سَعَى"**.

وفي برضو من اللطائف في الآية، قالوا إيه الفرق بين "يذكر" و "يتذكر"؟ ليه ما قالش "يوم يذكر الإنسان ما سعى"؟ قال **"يَوْمَ يَتَذَكَّرُ"** بعضهم قال، بعض العلماء قال يذكر زي ما هتيجي في عبس **"أَوْ يَذَّكَّرُ فَتَنْفَعَهُ الذِّكْرَى"** عبس:4 يذكر أي التذكر الإجمالي، لكن **"يَتَذَكَّرُ"** التذكر التفصيلي..

لما الكلمة اتفكت واتفصصت بقى في تفصيل، ف **"يَوْمَ يَتَذَكَّرُ الْإِنْسَانُ مَا سَعَى"** مش هيفتكرك إنه كان وحش، ولا هيفتكرك إنه كان مثلاً والعياذ بالله واحد كان كافر هيفتكرك لالأ.. ده هيتذكر تفاصيل المعاصي، هيتذكر لحظات ما عُرض عليه القرآن ورفض، هيتذكر لحظات الهمَّ بالمعصية **"يَوْمَ يَتَذَكَّرُ"** تذكر تفصيل لحظات المعصية، مشهد يعني يخلي الإنسان يفزع، لما يبجي يوم القيامة وشايف الكون كله بيتغير، وقاعد ذهنه شغال، ومبيفكرش في حاجة غير كده، أبوه يعدي من قدامه وأمه تصرخ، أخته تنادي عليه، زوجته وأولاده بيصوتوا، هو مبيفكرش غير في ذنوبه

## والعباد بالله.

سيظهر كل ما حاولتم إخفاءه

"يَوْمَ يَتَذَكَّرُ الْإِنْسَانُ مَا سَعَى \* وَبُرَزَّتْ الْجَحِيمُ لِمَنْ يَرَى" النازعات: 35,36 "وَبُرَزَّتْ الْجَحِيمُ" تظهر غضب عنهم، تطلعهم بقى "وَبُرَزَّتْ الْجَحِيمُ لِمَنْ يَرَى" وكأن الجهد الإعلامي الساحر اللي كانوا يحاولوا يخبوا على الناس الدار الآخرة يحاولوا يغطوا على الناس الكلام عن النار، هتظهر لكم غضب عنكم دلوقتي، كل الجهود اللي إنتوا بذلتوه عشان تبعدوا الناس متتكلمش عن النار أو الناس متسمعش عن النار هتظهر غضب عنكم دلوقتي "وَبُرَزَّتْ الْجَحِيمُ لِمَنْ يَرَى".

هل ستفضّل دنياك أم ستعمل لآخرتك؟ اختر طريقك من الآن

والناس هتنقسم قسمين: "فَأَمَّا مَنْ طَغَى"، "أَذْهَبَ إِلَى فِرْعَوْنَ إِنَّهُ طَغَى" النازعات: 17 في أول السورة "فَأَمَّا مَنْ طَغَى \* وَأَثَرَ الْحَيَاةَ الدُّنْيَا \* فَإِنَّ الْجَحِيمَ هِيَ الْمَأْوَى \* وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَى \* فَإِنَّ الْجَنَّةَ هِيَ الْمَأْوَى" النازعات: 37:41

يبقى إذا فيه فريقين وكل فريق طريق، يعني إيه طريق؟ يعني دي اختيارات، يعني كلمة "وَأَثَرَ الْحَيَاةَ الدُّنْيَا" مش لقي نفسه عاصي، ده هو اختار الدنيا، وقاوم نفسه وجات له طاعات محببة ورفضها وسمع آيات كبرى ومرضاش عقله يخضع لها وسمع آيات القرآن ومرضاش يتأثر بيها "فَأَمَّا مَنْ طَغَى" ..

وقلنا التركيز في السورة على النفس التي تُنزع في أول السورة، والتي رفضت أن تتزكى في منتصف السورة ودي بقى أخطر مرض في النفس مرض الطغيان، ربنا بيقول إن الطغيان ده يخلي الإنسان "وَأَثَرَ الْحَيَاةَ الدُّنْيَا" إما إنه طغى فعشان طغى اختار الحياة الدنيا، أو إنه اختار الحياة الدنيا فعشان كده طغى، يعني إما طغى دي النتيجة بعد ما اختار الحياة الدنيا "وَأَثَرَ الْحَيَاةَ الدُّنْيَا" هو السبب، أو طغى ده السبب نفسه بقت طاغية مش عايز يقبل من حد؛ فبالنالي اختار الحياة الدنيا واللاتين هيوصلوا على بعض.

احذر من اختيار الحياة السفلى.. فهي لن تبقى

"فَأَمَّا مَنْ طَغَى \* وَأَثَرَ الْحَيَاةَ الدُّنْيَا" "أَثَرَ" أعلى من كلمة اختار شوية، ليه بقى؟ خد بالك من كلمة كمان "الدُّنْيَا" الدنيا يعني الواطية، يعني اختار المكان الأسفل، اختار الحياة السفلى، يعني كلمة "الْحَيَاةَ الدُّنْيَا" أي الحياة السفلى، اختار أن يكون في الأسفل، "أَثَرَ" الأثر يقولك ده أثر فلان يعني بقية مشيه، مشي أو ساب أثر يعني ساب حاجة باقية، فكلمة "أَثَرَ" يعني يستبقي لنفسه شيء، فكلمة "يُؤَثِّرُونَ عَلَى أَنْفُسِهِمْ" يعني يختار بقاء إخوانه على بقاء نفسه "وَلَوْ كَانَ بِهِمْ خَصَاصَةٌ" الحشر: 9 يعني لو هيموت يختار بقاء إخوانه على بقاء نفسه، فكلمة "أَثَرَ" فيها معنى البقاء؛ فقالوا "وَأَثَرَ الْحَيَاةَ الدُّنْيَا" ظنّ أنها ستبقى فاخترها، يبقى "أَثَرَ الْحَيَاةَ الدُّنْيَا" اختار ما يتبقى، عارف إن الحاجة دي

هتبقى فاختارها.

"كَلَّا بَلْ تُحِبُّونَ الْعَاجِلَةَ" القيامة:20 في واحد اختار الحاجة الأسرع، فرينا يقولهم هنا "وَأَثَرَ الْحَيَاةِ الدُّنْيَا" يعني ظنّ أنّها ستبقى، زي سورة الهمزة: "وَيْلٌ لِّكُلِّ هُمَزَةٍ لُّمَزَةٍ\* الَّذِي جَمَعَ مَالًا وَعَدَّدَهُ\* يَحْسَبُ أَنَّ مَالَهُ أَخْلَدَهُ" الهمزة 1:3 يظن أن المال سيجعله خالدًا، يظن أن هذا المال سيجعله مخلد في الدنيا، فهنا "وَأَثَرَ الْحَيَاةِ الدُّنْيَا" اختار الحياة السفلى، هو بنفسه اللي اختار، هو بنفسه اللي قرر أنا همشي في الطريق ده، هو اعتقد أو أوهم نفسه إن الدنيا دي هتبقى "إِنَّ الَّذِينَ لَا يَرْجُونَ لِقَاءَنَا وَرَضُوا بِالْحَيَاةِ الدُّنْيَا" ومش بس كده "وَاطْمَأَنُّوا بِهَا" يونس:7 يقولك أنا مطمئن.. الدنيا دي مش هتروح، أنا معايا كل الأسباب، لو الهلاك بالريح أنا هعيش في أماكن تمنع عني الريح، لو الهلاك بالزلازل أنا هجيب جهاز قياس الزلازل وهعمل احتياطي، هو يظن "وَوَطَّنُوا إِنَّهُمْ مَأْنَعْتُهُمْ حُصُونُهُمْ مِّنَ اللَّهِ" الحشر:2.

"أَثَرَ الْحَيَاةِ الدُّنْيَا" يبقى كان عنده اختيارات، كل ما يتعارض، فكلمة "أَثَرَ" بمعنى إن كان بيحصل اختيارات قدّامه، كان بيحصل تعارضات، يختار الطريق ده ولا الطريق ده؟ يسمع كلام ده ولا يسمع كلام ده؟ فاختار الحياة الدنيا، اختار الحياة الدنيا، الثاني كان بيحصل اختيارات، طب هنشوف كان بيعمل إيه؟ الآية الثانية..

هل ترضى بالنار ماوى لك؟

أو الأول "وَأَثَرَ الْحَيَاةِ الدُّنْيَا" النازعات:38 طاب ده نتيجته إيه؟ "فَإِنَّ الْجَحِيمَ هِيَ الْمَأْوَى" النازعات:39 المأوى في اللغة: المكان اللي تلجأ إليه وإنت بتهرب، المأوى في اللغة: المكان اللي بعد ما كنت فزع تطمئن فيه، المكان في اللغة: المكان اللي إنت كنت تعبان فتروح تستريح فيه، يقولك آوى إلى فراشه، كان يبجري فأوى إلى كذا، فأواهم المبيت إلى غار، فتخيل لما يبقى المكان اللي لما يبقوا في فزع المفروض يروحوا يطمئنوا به، أو يبقوا تعبانين يروحوا يستريحوا فيه، أو يبقى يعني خلاص محتاج أي مكان يستريح فيه يبقى هو الجحيم!! والعياذ بالله وهو اللي اختار ده!! زي ما ساب نفسه مُرْفَهه ومامنعهش نفسه ومروضهاش "فَإِنَّ الْجَحِيمَ هِيَ الْمَأْوَى".

الفائز من نهي نفسه عن شهواتها وهواها

طب الثاني "وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَى" النازعات:40 ده مربوط السورة، ده المعنى اللي مهم جدًا في السورة "وَنَهَى النَّفْسَ عَنِ الْهَوَى" قلنا المعاني اللي بتركز عليها السورة: النفس وطغيانها؛ لذلك "وَنَهَى النَّفْسَ عَنِ الْهَوَى" النفس فيها هوى، ربنا مقالش استأصل الهوى من النفس، لذلك لما جُم بعض الصحابة يستأذنون النبي صلى الله عليه وسلم إنه يقطع شهوته تمامًا، فرفض النبي صلى الله عليه وسلم، ليه؟ لأن إنت لازم هتفضل جواك الشهوة، لكن دورك.. ماهو إن هو اختصار لما طلبه منه ده، إنت كده بتمنع.. ماهو التكليف؟ إن يفضل جواك الشهوة وإنت تقولها لأ، فكلمة "نَهَى النَّفْسَ عَنِ الْهَوَى" يعني النفس كل شوية تقولك عايزة تقولها لأ! يعني اللي مش هيعرف يقول لنفسه لأ هبخش النار! هي كلمة "نَهَى النَّفْسَ" يعني يقول لنفسه نهي يعني ينهاها، فهني النفس، والنفس عايزة حاجة والنفس هتفضل عايزة حاجة، هتفضل بتهوى حاجات من الحرام وإنت دورك.. ده مش هيُنزَع منها، ده مركب

فيها الجزء الطيني بتاعها مركب فيه كده، دورك إنك تقولها لأ **"وَنَهَى النَّفْسَ عَنِ الْهَوَىٰ"** كُتِرَ ما تقول لنفسك، خد بالك معايا من النقطة دي، **نفسك هتطلب منك، تقولها لأ، فتبدأ تُرَوِّض وتتهذب وتُزَكِّي، فتطلب حرام تقولها لأ، تطلب تَوَسُّع في المباحات تقولها لأ.. لأ تنهى نفسك، تنهى نفسك، تنهى نفسك تبقى مروضة مُطِيعَة، تيجي لما تموت الملائكة تقولها اخرجي فتخرج، تبقى نشطة ليه؟ لأن إنت نهييت نفسك كتير فنفسك بقت مروضة، تيجي لما تموت تخرج بسهولة.**

### النفس المدللة تُهَلِّك صاحبها

النفس الثانية اللي **"وَأَثَرَ الْحَيَاةِ الدُّنْيَا"** كل لما نفسه تقوله حاجة يقوله حاضر، ييجي يقول لنفسه لأ نفسه تستأسد عليه؛ فيقولها حاضر، بقت نفسه مدللة، مدلعة فنفسه لما تيجي تموت الملائكة تقولها اخرجي تقول لأ، عمر ما حد قال لنفسه لأ، عمره ما قال لنفسه لأ، بيعمل اللي هو عايزه بيختار الدنيا؛ فنفسه تتفرق في الجسد، نفسه مش مُرَوِّضَة فتُضْرَب، الجسد يُضْرَب.. على وجوههم وعلى أديارهم، يفضل يضرب لغايت ما نفسه تخرج وتُنزَع منه النفس.

### على قدر ترويض النفس تكون سهولة خروجها

يبقى إذن علاقة النزاعات والناشطات بكلمة **"طَعَى"** و **"تَزَكَّى"** و **"نَهَى النَّفْسَ عَنِ الْهَوَىٰ"** النفس التي تُرَوِّض تخرج بسهولة في الموت، والنفس التي لم تُرَوِّض تُنزع ويُغرق في نزعها؛ لأنها لم تروض، لذلك لما سيدنا موسى راح قاله، قاله أنا جايلك علاج لنفسك، أنا جايلك بعلاج لأكثر الأمراض المستعصية وهو الكِبَر والطغيان **"هَلْ لَكَ إِلَى أَنْ تَزَكَّى"** النزاعات: 18 أنا معايا العلاج، مرضاش ياخذ العلاج، فهنا **"وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَىٰ"** النزاعات: 40 اللي يقول لنفسه لأ، النفس تبقى مُرَوِّضَة فتخرج كالقطرة من فيه السقاء؛ لأنها بقت مُهَدَّبَة، على قَدْر ترويض النفس على قدر سهولة خروجها، وعلى قَدْر استئساد النفس وعدم ترويضها على قَدْر ما هتُنزع والعياذ بالله.

### من أعظم أسباب ترك المعاصي.. تَدَكُّرُ الوَقُوفِ أمام الله

طيب أكثر حاجة تساعدك إنك تقول لنفسك لأ **"وَأَمَّا مَنْ خَافَ مَقَامَ رَبِّهِ"** تَدَكُّرُ هذه اللحظة، لحظة الوقوف بين يَدَي الله، إن الواحد هيقف عريانًا، فردًا بين يدي الله، يضع رأسه في الأرض، ويقرره الله بذنوبه، هذه اللحظة التي ينكرها المشركون، هذه اللحظة التي يكرهها الحكام والمستبدون الظَّلمَة الطُّغَاة، **"إِنَّهُ طَعَى"** ليه؟ لأنه هو طاغية عايز الناس تقف قدامه ذليلة، فرينا بيقوله إنت لازم تتذكر اللحظة اللي هتقف فيها ذليل بين يَدَي الله، هو يرفض هذا، لذلك رفض إبليس السجود، وقال: **"أَسْجُدْ لِمَنْ خَلَقْتَ طِينًا"** الإسراء: 31 رفض إبليس والعياذ بالله السجود، فاللحظة دي هي اللي تكسر نفس الإنسان، الوقوف بين يدي الله **"وَأَمَّا مَنْ خَافَ مَقَامَ رَبِّهِ"** اللي دايمًا اللحظة دي في ذهنه يعرف يقول لنفسه لأ، يقول لنفسه إحنا هنقف بين إيدين رينا وهيسألنا! بلاش دي.. دي لأ، نفسه تقوله عايزة دي.. دي لأ.

## ما معنى كلمة "الهوى"؟

وخذ بالك من كلمة "الهوى" الهوى في مقاييس اللغة للإمام بن فارس قال معنى رائع، قال الهوى فيه معنيين: الخلو يعني الفراغ، "الخلو والسقوط" يعني يقول إن الهوى لازم يجمع بين معنيين.. يعني الهوى حاجة فاضية و "هوى" يعني سقط، فقال الهوى يجمع بين حاجتين، فضاء، خلو وسقوط، فقال طاب يعني إيه "هوى النفس" قال: "هو الخلو من كل خير" مفيش خير يمنعها من حاجة فبالتالي تسقط في كل شر، "الخلو من كل خير فتسقط في كل شر".  
كان يتعرض عليه "ترغى" كان يتعرض عليه إن نفسه بدل ما تبقى حاوية ومليانة كلها شرور تُنقى وتُطهر وتنمو، رفض.. فأصبح "نَهَى النَّفْسَ عَنِ الْهَوَى" فالهوى: هو السقوط.

## جاهد نفسك وامنعها من أهوائها لتأوي بها إلى الجنة

خد بالك بقي من الكلام الجميل ما بين "وَأَثَرَ الْحَيَاةِ الدُّنْيَا" هو بنفسه وطى اختار الحياة الدنيا، الدنيا يعني السفلى.. وبين الهوى، إن نفسه جايه تقع يقولها: لا "نَهَى النَّفْسَ عَنِ الْهَوَى" يعني نفسه تريد أن تهوى، تسقط، إلى الدنيا وهو يقولها لا فيرفع نفسه، كل ما نفسه تيجي تقع يقولها لا "مَا لَكُمْ إِذَا قِيلَ لَكُمْ انْفِرُوا فِي سَبِيلِ اللَّهِ اثَّاقَلْتُمْ إِلَى الْأَرْضِ" التوبة:38.

فاجاهد بينز النفس دي ويقولها اطلعي لفوق "إن الله يحب معالي الأمور ويكره سفاسفها" حسنه الألباني لذلك هنا كلمة "وَنَهَى النَّفْسَ عَنِ الْهَوَى" يعني يمنع نفسه إن هي تسقط في الشهوات، عكس "وَأَثَرَ الْحَيَاةِ الدُّنْيَا" هو اللي يقول لنفسه تعالي نزل إلى الشهوات والعباد بالله، الحياة الدنيا هي الحياة السفلى، فكلمة الهوى والسقوط إلى أسفل شبه كلمة الدنيا.. الحياة الدنيا، لكن ده بيمنعها وده بيختار الحياة الدنيا.

"وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَىٰ فَإِنَّ الْجَنَّةَ هِيَ الْمَأْوَىٰ" يبقى إذا عشان تأوي للجنة، اللي قاعد يقول لنفسه لألأ تعبان، فيه حاجات كتير كان نفسه فيها منع نفسه منها فهي دي بقى يأوي إلى الجنة، التاني كان بيرطع يعني "يَتَمَتَّعُونَ وَيَأْكُلُونَ كَمَا تَأْكُلُ الْأَنْعَامُ" محمد:12 فده هياوي إلى الجحيم والعباد بالله.

## ماذا سيكون اختيارك؟.. الأمن في الدنيا أم في الآخرة؟

ولا يجمع الله عز وجل أبداً على عبد مخافتين ولا أمنين، فإن خافه العبد لو العبد خاف الله عز وجل في الدنيا آمنه الله فكذلك العبد اللي ينهى نفسه دي وتروض تيجي بقى الناشطات نشطاً تخرج بسهولة وتسبح في السماء وتتسابق على حسب الأعمال وتقرب من الله عز وجل والفردوس الأعلى وتنعم في الجنة.

"وَأَمَّا مَنْ خَافَ مَقَامَ رَبِّهِ" يبقى إذا هذه اللحظة لا تغيب عن أعيننا أبداً، الوقوف بين يدي الله والسؤال عن النقيير والقطمير "وَأَمَّا مَنْ خَافَ مَقَامَ رَبِّهِ وَنَهَى النَّفْسَ عَنِ الْهَوَىٰ فَإِنَّ الْجَنَّةَ هِيَ الْمَأْوَىٰ".

## بعد كل الآيات والدلالات لايزالون يستهزؤون بالساعة

طيب بعد كل البيان ده، بعد كل هذا البيان المعجز من أول النازعات وبعدين الراجفة وبعدين الرادفة وبعدين منظر الاستهزاء "يَقُولُونَ إِنَّا لَمَرْدُودُونَ فِي الْحَافِرَةِ" النازعات:10 وبعدين منظر فرعون وهو يطغى وبعدين وهو يهلك وبعدين منظر السماء "وَأَغْطَشَ لَيْلَهَا وَأَخْرَجَ ضُحَاهَا" وبعدين ثاني "الطَّامَّةُ الْكُبْرَى" وبعدين الجنة، وبعدين النار.. لسه بصيغة المضارع "يَسْأَلُونَكَ عَنِ السَّاعَةِ" النازعات:42 و"يسألونك" دي ترجعنا لأول النبأ "عَمَّ يَتَسَاءَلُونَ \* عَنِ النَّبِيِّ الْعَظِيمِ" النبأ:1،2 لسه قاعدين مجالس التساؤلات المستهزئة بعد سورة النبأ وسورة النازعات لسه قاعدين القعدة دي اللي مليانة سخرية واستهزاء ويتسألوا؟

وبعدين بتسألوا عن إيه؟ "يَسْأَلُونَكَ عَنِ السَّاعَةِ" ها.. بدأ يفوقوا "أَيَّانَ مَرْسَاهَا" استبعاد ياه هتيجي إمتى.. حَلِّني على ما تيجي، سؤال استهزاء، قولنا كدا هي إمتى، اللي يخاف يسأل أعمال إيه، يعني الطالب الشاطر أيام الامتحانات تلاقيه مشغول أكثر يذاكر إيه خلاص موعد الامتحان، الثاني كل هممه قبل ما ييجي الامتحان بيومين نبقي نقعد نذاكر اللي باقيننا، لذلك "الَّذِينَ آمَنُوا مُشْفِقُونَ مِنْهَا" الشورى:18، خايف من الساعة فده طالما بييسأل عن إمتى يبقى مش عايز يشتغل "أَيَّانَ مَرْسَاهَا" لو كان عايز يشتغل كان يقوله أعمال إيه؟ أنا عايز أنجو، أنهى نفسي إزاي عن الهوى؟ أريد أن أتركي، لكن ده لسه بيتساءل سؤال المستهزئ، لسه بصيغة المضارع قاعدين الجلسات الاستهزائية. "يَسْأَلُونَكَ عَنِ السَّاعَةِ أَيَّانَ مَرْسَاهَا" ..

### يحذر الله نبيه من الالتفات لبعض أسئلة الكفار

فرينا يقول للنبي صلى الله عليه وسلم محذراً إنَّ لازم ناخذ بالناس يا جماعة من القواعد القرآنية الهامة، أهل الباطل مش كل الأسئلة بتاعتهم بيتجاوب عليها، لأنَّ أحياناً من أسألتهم وده كثير عايز يصرف الداعية عن طريقه زي ما ربنا قال في سورة الزخرف "مَا ضَرَبُوهُ لَكَ إِلَّا جَدَلًا" الزخرف:58 فيه أسئلة وأمثلة بيحبوها عشان الجدال فقط، فرينا بيحذر النبي صلى الله عليه وسلم هنا إنَّه يلتفت معاهم ويحقلهم طموحاتهم وأمانيتهم وينسى أساس دعوته صلى الله عليه وسلم.

### الساعة لا يعرف موعدها إلا الله

فرينا يقول "فِيمَ أَنْتَ مِنْ ذِكْرَاهَا" النازعات:43 أي في أي شيء أنت من ذكراها؟ أي ليس عندك أي قدرة ولا معرفة تستطيع بيها الوصول إلى موعد الساعة، بييسألوك عن شيء خارج الطاقة، خارج الطاقة البشرية وخارج كل المخلوقات، "فِيمَ أَنْتَ مِنْ ذِكْرَاهَا \* إِلَى رَبِّكَ" أي وحده سبحانه وتعالى "إِلَى رَبِّكَ مُنْتَهَاهَا" النازعات:44 لا يعلم موعدها إلا الله عز وجل.

### احذر أن يشغلك عن مهمتك الأساسية

بيقوله "إِنَّمَا" بصيغة الحصر والقصر "إِنَّمَا أَنْتَ مُنْذِرٌ" إنت مش دورك إنك تقولهم إمتى، مش دورك إنك تحقلهم

طلب الآيات الحسية اللي هما عايزينها، ده مش دورك عشان أسئلة أهل الباطل ما تحودش الدعاة وينشغلوا ويعملوهم حاجات ويسيبوا طريقهم الأساسي، **طريق الدعاة الأساسي هو الإنذار.**

### لا تنشغل بالمستغنين.. انشغل بالمقبلين

"**إِنَّمَا أَنْتَ مُنذِرٌ مَّنْ يَخْشَاهَا**" طبعاً أنت منذر لكل الناس لكن ربنا بيعرّفه ابتداءً حتى لا تأسى عليهم ولا تأسف عليهم "**فَلَعَلَّكَ بَاخِعٌ نَّفْسَكَ**" الكهف:6 حتى لا يحدث هذا إنك لن يستفيد منك إلا الذي يخاف، اللي خايف من جواه فطرته لسه سليمة وخايف إن له رب وهيبعث والكلام القرآن هيسمعه ويتأثر بيه ده اللي هيستفيد غير كدا مش هيستفيد.

الطاغية اللي نفسه مستأسدة عليه اللي عايز يفجر "**بَلْ يُرِيدُ الْإِنْسَانُ لِيَفْجُرَ أَمَامَهُ**" القيامة:5 اللي عايز ينطلق في الشهوات اللي عايز الناس يبقوا أذلاء بين يديه ده مش هيستفيد، "**إِنَّمَا أَنْتَ مُنذِرٌ مَّنْ يَخْشَاهَا**" ما تضيعش وقتك معاهم ركز في وظيفتك، لذلك لما ربنا قاله في آخر سورة النازعات "**إِنَّمَا أَنْتَ مُنذِرٌ مَّنْ يَخْشَاهَا**" عاتبه في السورة اللي بعدها لأنه قاله إنت دورك الإنذار فقاله "**عَبَسَ وَتَوَلَّى \* أَنْ جَاءَهُ الْأَعْمَى \* وَمَا يُدْرِيكَ لَعَلَّهُ يَزَكَّى \* أَوْ يَذَّكَّرُ فَتَنْفَعُهُ الذِّكْرَى \* أَمَّا مَنْ اسْتَعَى**" النازعات:1:5 آخر سورة النازعات قاله ما تنشغلش بالمستغنين، انشغل بالمقبلين، فعاتبه في السورة اللي بعدها صلى الله عليه وسلم وهنتكلم إن شاء الله المرة الجاية "**إِنَّمَا أَنْتَ مُنذِرٌ مَّنْ يَخْشَاهَا \* كَانَتْهُمْ يَوْمَ يَرَوْنَهَا لَمْ يَلْبَثُوا إِلَّا عَشِيَّةً أَوْ ضُحَاهَا**" النازعات:45،46.

### ستدرك أن الحياة قصيرة بعد فوان الأون

عجيب أوي الحتام بمشهد إن بُعثوا وبعد البعث قالوا إيه ده؟ إحنا قعدنا في الدنيا قد إيه؟ ده إحنا قعدنا في الدنيا يا إما من العصر للمغرب أو الصبح بتاع اليوم دا كمان يعني يا دوبك إيه؟ حاجة فاكرينها أول نهار اليوم ده. شوف أنا عايزك تشوف التضاد ما بين "**أَيَّانَ مُرْسَاهَا**" واحد بيستطيل الحياة الدنيا بيقول ياااه حلّي يا عم عما القيامة تقوم أيان يوم القيامة لذلك على طول "**فَإِذَا بَرِقَ الْبَصَرُ**" القيامة:7 هنا برضو بيقول "**أَيَّانَ مُرْسَاهَا**" فرينا جابلهم مشهد استقصار الحياة الدنيا..

فخدوا بالكوا من المشاهد الإيه؟ المتضادة دي، ربنا بيقوله إنت كنت بتستبعد حدوث هذا وبتسطيب طول الحياة بقالك إنت وآباءك وأجدادك ولسه شايف إن أحفادك وأحفادك هيعيشوا فمستبعد هذا، فرينا يجيبه مشهد إنه خلاص بُعث وإنّ بالفعل قام وإنه بيستقصر ويقولك إيه ده؟ أنا مالققتش أعيش حاجة، مش دي اللي إنت كنت بتقول "**أَيَّانَ مُرْسَاهَا**" فجابله المشهد "**كَانَتْهُمْ يَوْمَ يَرَوْنَهَا لَمْ يَلْبَثُوا إِلَّا عَشِيَّةً أَوْ ضُحَاهَا**".

### الضغط القرآني.. أسلوب القرآن في مخاطبة المنكرين

أسلوب القرآن إنه بيخاطب المنكر، الحاجة اللي بينكرها، بيكلمه على إنها أمر واقع وإن هي هتحصل، بل حصلت وبيقوله إنت هتبقى يومئذ كذا، يعني مثلاً واحد بيستبعد إن فيه امتحانات إنت أمّا تحب بقى تضغط عليه مش تقوله

مش تقنعه إنَّ فيه امتحانات، إنت بتكلمه عن نتيجة الامتحانات لما تسقط هيحصل فيك إيه، يعني واحد يقولك مافيش امتحانات أصلاً، إنت تقوله بقى ده فيه.. إنت تجاوزت موعد الامتحان وفيه امتحان وإيه هو الامتحان، إنت بتتكلم عن نتيجة الامتحان، عن ماذا يحدث ما بعد الامتحان، ده أسلوب الضغط القرآني "أَلَا يَعْلَمُ مَنْ خَلَقَ وَهُوَ اللَّطِيفُ الْخَبِيرُ" الملك: 14 القرآن بيحيط بالنفوس.

أسأل الله عز وجل أن يستعملنا و أن يجعلنا من أهل القرآن.  
أقول قولي هذا وأستغفر الله لي ولكم، سبحانك اللهم وبحمدك أشهد أن لا إله إلا أنت أستغفرك وأتوب إليك،  
وجزاكم الله خيراً.

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>